



官常典第六百二十六卷

郡守部紀事四

宋史吳延祚傳元載延祚子雍熙三年知秦州州民李益者爲長道縣酒務官家饒於財僮奴數千指恣橫持郡吏短長吏而下皆畏之民負息錢者數百家郡爲督理如公家租調獨推官馬伋不從益遣奴數輩伺伋按行市中拽之下馬因毀辱之先是益厚賂朝中權貴爲庇護故累年不敗及伋屢表其事又爲邸吏所匿不得達後因市馬譯者附表以聞譯因入見上其表帝大怒詔元載逮捕之詔書未至京師權貴已報益益懼亡命元載以聞帝愈怒詔州郡物色急捕之獲於河中府民郝氏家鞫於御史府具得其狀斬之盡沒其家益子仕衡先舉進士任光祿寺丞詔除籍終身不齒益之伏法民皆飯僧相慶端拱初遷西上閣門使淳化二年加領富州刺史俄徙知成都府蜀俗奢侈好遊蕩民無贏餘悉市酒肉爲聲妓樂元載禁止之吏民細罪又不少貸人多怨咎及王小波亂元載不能捕滅受代歸闕而成都不守時李仕衡通判華州常銜元載因事殺其父伺元載至闕遣人闔行裝收其關市之稅元載拒之仕衡抗章疏其罪坐責郢州團練副使

合璧事類宋太宗朝賈黃中知昇州一日案行府庫見扇鎖甚嚴發之得寶貨數千櫝皆李氏宮闈物初不隸於籍黃中悉表上之太宗嘆曰府庫之物有籍貪黷者尙冒禁取之況此亡國之餘物乎賜錢二百萬以旌其潔

宋史宗室傳不惠字仁仲知開州開在巴東俗鄙陋不惠爲興學俾民知孝義郡有鹽井舊長吏必遣所親監之私其利不惠罷遣鹽利倍入郡計用饒以羨餘代民輸夏秋兩稅及天申節銀絹在開二年民絕鬪爭夜戶不閉諸司交薦以比古循吏轉夔州轉運判官開人數千遮城門不得行

李虛己傳虛己父寅舉進士起家爲衢州司理叅軍虛己亦進士第歷知遂州時太宗嘗手書累二十餘紙曰公勤潔己奉法除奸惠愛臨民者乃可書爲勞績月給奉以寶錢命有司擇羣臣以治最聞者賜之時虛己受賜因獻詩自陳父子遭遇榮及祖母帝悅爲批其紙尾曰虛己學古入官榮親事生奉書爲郡欲布新規朕得良二千石矣

王禹偁傳禹偁出知滁州州境二虎鬪其一死食之殆半羣雞夜鳴經月不止冬雷暴作禹偁手疏引洪範傳陳戒且自劾上詢日官云守土者當其咎上惜禹偁才是日命徙蘄州禹偁上表謝有宣

室鬼神之間不望生還茂陵封禪之書止期身後之語上異之果至郡未逾月而卒

東軒筆錄王禹偁在太宗末年以事責守滁州到任謝表略曰諸縣豐登苦無公事一家飽煖全荷君恩禹偁有遺愛滁州懷之畫於堂以祠焉慶曆中歐陽修責守滁州觀禹偁遺像而作詩曰偶然來繼前賢迹信矣皆如昔日言諸縣豐登少公事一家飽煖荷君恩想公風采猶如在顧我文章不足論名姓已光青史上壁間容貌任塵昏皆用其表中語也

宋史凌策傳策以集賢殿學士知益州初策登第夢人以六印加劍上遺之其後往劍外凡六任時以爲異

張詠傳詠知益州時李順搆亂王繼恩上官正總兵攻討緩師不進詠以言激正勉其親行仍盛爲供帳餞之酒酣舉爵屬軍校曰汝曹蒙國厚恩無以塞責此行當直抵寇壘平蕩醜類若老師曠日卽此地還爲爾死所矣正由是決行深入克捷時寇略之際民多脅從詠移文諭以朝廷恩信使各歸田里民間訛言有白頭翁午後食人兒女一郡囂然至暮路無行人旣而得造訛者戮之民遂帖息詠曰妖訛之興沴氣乘之妖則有形訛則有聲止訛之術在乎識斷不在厭勝也

後山談叢乖崖自成都召爲參知政事既至而腦疽大作不可巾幘乖崖自陳求補外真宗使軟裏赴朝乖崖曰豈可以臣一人而壞朝廷法制耶乃知杭而疾愈上聞之使中人往視之言且將召也丁晉公以白金千兩賜使者還言如故乃不召

宋史邢昺傳昺以刑部侍郎兼祭酒學士以羸老艱於趨步上前自陳曹州故鄉願給假一年歸視田里俟明年郊祀還朝上命坐慰勞之因謂曰便可權本州何須假耶昺又言楊礪夏侯嶠同爲府僚二臣沒皆贈尙書上憫之翌日謂宰相曰此可見其志矣卽超拜工部尙書知曹州職如故入辭日賜襲衣金帶是日特開龍圖閣召近臣宴崇和殿上作五七言詩二首賜之預宴者皆賦昺視壁間尙書禮記圖指中庸篇曰凡爲天下國家有九經因陳其大義上嘉納之及行又令近臣祖送設會於宜春苑

墨客揮犀李侍郎性清介簡重知杭州惡其俗輕靡不事遊燕一日微雪遽命出郊衆謂當召賓朋爲高會乃獨訪林逋處士清談至暮而歸任中未嘗買物及去惟市白樂天集一部而已

包樞

密知府禮上日衆吏咸請諱公曰何諱也吏曰公祖先之名羣吏當避之公瞋目曰吾無所諱惟諱

吏之有贓污者吏懼而引去吁公儒者之通敏者也任府尹十餘年民吏稱爲神明然爲大尹十餘年近世亦稀有

宋史歐陽修傳修知滁州自號醉翁晚更號六一居士凡歷數郡不見治迹不求聲譽寬簡而不擾故所至民便之或問爲政寬簡而事不弛廢何也曰以縱爲寬以略爲簡則政事弛廢而民受其弊吾所謂寬者不爲苛急簡者不爲煩碎耳

劉敞傳敞字原父知揚州揚之雷塘漢雷陂也舊爲民田其後官取陂水而不償以它田主皆失業然塘亦破決不可漕州復用爲田敞據塘舊券悉用還民發運使爭之敞卒以予民天長縣鞠王甲殺人既具獄敞見而察其冤甲畏吏不敢自直敞以委戶曹杜誘誘不能有所平反而傳致益牢將論囚敞曰冤也親按問之甲知能爲己直乃敢告蓋殺人者富人陳氏也相傳以爲神明徙鄆州鄆比易守政不治市邑攘攷公行敞決獄訟明賞罰境內肅然客行壽張道中遺一囊錢人莫敢取以告里長里長爲守視客還取得之又有暮遺物市中者且往訪之故在先是久旱地多蝗敞至而雨蝗出境

却掃編歐陽文忠公始自河北都轉運謫守滁州於琅琊山間作亭名曰醉翁自爲之記其後王詔守滁請東坡大書此記而刻之流布世間殆家有之亭名遂聞於天下政和中唐少宰恪守滁亦作亭山間名曰同醉自作記且大書之立石亭上意以配前人云

東軒筆錄職方郎中胡校判吏部南曹歲滿除知興元府先是由判曹得監司者甚衆校素有所望洎得郡殊自失歷干執政皆不允時陳升之知樞密院校往謁求薦陳公辭以避位執政不當私薦一士校愀然嘆息曰興元道遠校本浙人家貧無力之任惟有兩女當賣人爲婢庶得貲以行耳陳公鄙其言遽索湯使起校得湯三奠於地而辭去陳大駭時校將還浙右待闕已登舟其日作詩書於船牕曰西梁萬里何時到爭似懷沙入九泉是夕溺死汴水初執政以校無正室疑奸吏謀殺之方將窮治會陳公言賣女奠湯事及得牘間自題之句方信其失心而赴水也

劉彝所至多善

政其知處州也會江西饑歉民多棄子於道上彝揭榜通衢召人收養日給廣會倉米二升每月一次抱至官中看視又推行於縣鎮細民利二升之給皆爲子養故一境闕子無天闕者一日謁曾魯公公亮魯公曰久知都官治狀屢欲進擢然議論有所不合故少遲之吾終不忘也彝曰人之淹速

屈伸亦皆有命今姓名已蒙記而尙屈於不合之論亦某之命也魯公嘆曰比來士大夫見執政未始不有求求而不得卽多歸怨而君乃引命自安吾待罪政府將十年未見如君之言

宋史晏殊傳殊出知宣州數月改應天府延范仲淹以教生徒自五代以來天下學校廢興學自殊始

富弼傳弼以資政殿學士出知鄆州移青州兼京東路安撫使河朔大水民流就食弼勸所部民出粟益以官廩得公私廬舍十餘萬區散處其人以便薪水官吏自前資待缺寄居者皆賦以祿使卽民所聚避老弱病瘠者廩之仍書其勞約他日爲奏請山林陂澤之利可資以生者聽流民擅取死者爲大塚葬之明年麥大熟民各以遠近受糧歸凡活五十餘萬人募爲兵者萬計帝聞之遣使褒勞拜禮部侍郎弼曰此守臣職也辭不受

張方平傳方平知滑州徙益州未至或扇言儂智高在南詔將入寇攝守亟調兵築城日夜不得息民大驚擾朝廷聞之發陝西步騎兵仗絡繹往戍蜀詔趣方平行許以便宜從事方平曰此必妄也道遇戍卒皆遣歸他役盡罷適上元張燈城門三夕不閉得叩部譯人始造此語者梟首境上而流

其餘黨蜀人遂安

贛州府志余良肱字康臣分寧人天順四年進士歷大理寺丞出知虔州有惠政先是仕嶺表者卒於官其妻若女不能自存咸流落爲人婢良肱遇喪車過虔州必力爲賑護之出境孤女無所歸者捐俸嫁之改知南康累遷光祿卿 孔宗翰字周翰孔子四十六代孫道輔之子登進士第嘉祐中權知州事州城歲爲水蓄東北隅尤易墊圯宗翰伐石爲址治鐵錮之自是水不爲患嘗以郡八景圖乞蘇軾詩八首刻諸石

南牕紀談傳獻簡公事仁英兩朝居言路楊前論事是是非非正色抗議未嘗少有苟容姑息之言退而與人道之亦未嘗少有矜驕自負之色及出爲郡循循然遵奉部條惟謹或問之曰公以直節聞天下今雖爲郡謂當時有所縱捨以自表見奈何俛首奉法如此何以自別於常人乎公曰不然君子素其位而行言官行言事之職牧守行守土之任此古人所以安分而明守也聞者嘆服司馬溫公嘗謂邵康節論近代人物曰清直勇三者人所難能也吾于欽之謂焉康節曰欽之清而不耀直而不激勇而不愠尤爲難矣世以爲知言

退朝錄夏鄭公爲宣徽使忠武軍節度使自河中府徙判蔡州道經許昌時李邯鄲爲守乃徙居他所空使宅以待之夏公以爲知體

合璧事類杜衍知乾州未滿歲安撫使察其治行以衍權鳳翔府二郡之民爭於界上一曰此我公也汝奪之一曰今我公也汝何有焉

東都事略趙尙寬知唐州按圖記得召信臣故跡復三大陂皆溉田萬餘頃廢田盡爲膏腴仁宗下詔褒美王安石作新田詩蘇軾亦作新渠詩五章

過庭錄許將冲元以前執政知大名府以剛略稱時曹蒙銜命察訪蔑視郡縣威令甚嚴至大名見冲元當廳下轎冲元出見其倨甚復入呼法司曰不知前執政作守監司得當廳下轎否法司具條白之不許竚立曹甚久復令白曹曰請就賓次以全國體曹失措而退許接武迎之謂曰在將無稱此乃朝廷禮耳公不可以人而輕國也曹氣懾無語更不問一毫事屏縮數日而去 冲元察御

僚屬甚嚴一日賓佐過廳一都監曳皮鞋而前許問曰公何得此鞋都監以爲美意云某衙一卒能造樞密或須之否許作色曰某非無此但不敢對同官著耳都監惶恐失措坐間數十客莫不各視

其足先子自州爲張子文所拉沿檄至大名坐中親觀此事

東軒筆錄仁宗朝兩制近臣得罪雖有贓汙亦止降爲散官無下獄者旋亦收叙熙寧初龍圖閣學士祖無擇始以臺官下秀州獄是時鄭獬知杭州上章救解言甚切直爾後許將沈季長劉奉世舒亶相繼下臺獄而天下習熟見聞莫有爲救解之者 王章惠公隨知揚州許元以舉子上謁自

陳世家乃唐許遠之後章惠率同僚上表薦其忠烈之家乞朝廷推恩而通判以下皆不從章惠遂獨狀薦之朝廷以爲郊社齋郎元有材謀曉錢穀爲江淮制置發運判官以至爲使凡十餘年號爲能臣終天章閣待制 韓忠憲公億知揚州日有大校李甲以財豪於鄉里誣執其兄之子爲他

姓賂里嫗之貌類者使認之爲己子又醉其嫂而嫁之盡奪其奩橐之畜嫂姪皆訴於州提刑轉運使每勘劾多爲甲行賂於胥吏其嫂姪被笞掠反自誣受杖而去積十餘年矣洎韓至又出訴韓察其寃因取前後案牘視之皆未嘗引乳醫爲証一日盡召其黨立庭下出乳醫示之衆皆伏罪子母復歸如初 范文正公仲淹自知開封落待制以吏部員外郎知饒州出都時惟王待制質館宿於城外汴水道之官歷十餘州無一人出迎迓者時陳恭公執中以龍圖閣直學士知揚州迎送問

勞甚至雖時宰好惡能移衆人而方正之士亦不可變也

宋子京博學能文章天資蘊藉好遊

宴以矜持自喜晚年知成都府帶唐書於本任刊修每宴罷盥漱畢開寢門垂簾燃二椽燭媵婢夾侍和墨伸紙遠近觀者皆知尙書修唐書矣望之如神仙焉

宋史呂溱傳溱以侍讀學士知徐州賜宴資善堂遣使諭曰此特爲卿設宜盡醉也詔自今由經筵出者視爲例

趙槩傳槩知洪州州城西南薄章江有汎溢之虞槩作石隄二百丈高五丈以障其衝水不爲患僚吏鄧陶饒爽挾持郡事爲不法前守莫能制州之歸化卒皆故時羣盜爽造飛語曰卒得廩米陳惡有怨言不更給善米且生變槩不答卒有自容州戍逃歸而犯夜者斬之以徇因收陶爽抵罪闔府股栗加直集賢院知青州坐失舉澠池令張誥免久乃起監密州酒知滁州山東有寇李二過境上告人曰我東人也公嘗爲青州民愛之如父母我不忍犯率衆去

聞燕常談杜祁公守兗州石守道卒於郡惡之者謂介僞死而北走詔覈實祁公會僚屬語之衆不敢當時龔輔之爲掌書記抗言曰介平生適諒有是耶願以闔族保其必死祁公悚然探懷中奏藁

示之曰老夫既保介矣君年少見義必爲豈可量哉今世居下位而能執義抗言如輔之者固難其人而爲郡守獎人之言以成其美名如祁公者未之見也

墨客揮犀舒王性酷嗜書雖寢食間手不釋卷晝或宴居默坐研究經旨知常州對客語未嘗有笑容一日大會賓佐倡優在庭公忽大笑人頗怪之乃共呼優人厚遺之曰汝之藝能使太守開顏其可賞也有一人竊疑公笑不由此因乘間啟公曰疇日席上偶思咸恆二卦豁悟微旨自喜有得故不覺發笑耳

宋史梅詢傳詢字昌言歷翰林侍讀學士累遷給事中在濠州夢人告曰呂丞相至矣旣而呂夷簡通判州事故待之甚厚其後援詢於廢斥中以至貴顯夷簡力也

种世衡傳世衡知環州蕃部有牛家族奴訛者素倔彊未嘗出謁郡守聞世衡至遽郊迎世衡與約明日當至其帳往勞部落是夕大雪深三尺左右曰地險不可往世衡曰吾方結諸羌以信不可失期遂緣險而進奴訛方臥帳中謂世衡必不能至世衡蹴而起之奴訛大驚曰前此未嘗有官至吾部者公乃不疑我耶率其族羅拜聽命其後百餘帳皆自歸莫敢貳

却掃編楊侍讀繪熙寧間知南京有惠政予及見故老有能道當時事者云春秋勸農時必微服屏騎從至田野中民莫知其太守也有獻漿水者欣然爲舉之以是多知民間疾苦之實亦以見前輩爲政平易如此

宋史范仲淹傳淹子純禮出知遂州瀘南有邊事調度苛棘純禮一以靜待之辨其可具者不取於民民圖像於廬奉之如神名曰范公庵草場火民情疑怖守吏惕息俟誅純禮曰草濕則生火何足怪但使密償之庫吏盜絲多罪至死純禮曰以焚然之絲而殺之吾不忍也聽其家趣買以贖命釋其株連者

翰苑新書曾肇知應天府當東南孔道宴勞無虛日肇曰飾廚傳以邀往來之譽吾不爲也乃積公帑之餘大興學校親加訓導養成人才爲多

彙苑詳注曾鞏爲州務去民疾苦急奸盜而寬貧弱曰爲害者不去則吾民不寧齊俗悍強喜攻劫至是豪宗大姓斂手莫敢動寇攘屏迹州卽肅清

却掃編王保和宣和末河北盜起以選出守大名慘酷彌甚得盜輒殺之然盜愈熾自以殺人旣衆

且懲開封之事常懼人圖己所居輒以甲士環繞然每對客焚香呂本宗舍人時從辟爲帥屬和語曰此正所謂兵衛森肅戟燕寢凝清香者也

臨江府志李大有字仲謙新喻人紹聖四年進士累擢中書門下省檢校公事權給事中守虔州宣和末金人犯京詔諸道勤王大有募義勇五千人入援淮甸歌曰天下奸臣皆守室虔州太守獨勤王後守三衢有宿寇猖獗下車卽平

却掃編李修撰夔丞相綱之父也政和中除守南陽迺者至問帑廩所積幾何吏對尙可支半年夔驚曰吾聞國無三年之儲國非其國也今止半年何可爲哉卽日上章請宮祠

老學庵筆記葉相夢錫守常州民有比屋居者忽作高屋屋山覆蓋鄰家鄰家訟之謂他日且占地葉判曰東家屋被西家蓋仔細思量無利害他時拆屋別陳詞如今且以壁爲界 賈表之名公

望文元公之孫也資稟甚豪嘗謂仕宦當作御史排擊姦邪否則爲將帥攻討羌戎餘不足爲也故平居惟好獵常自飼犬有妾焦氏者爲之飼鷹鷄寢食之外但治獵事曰此所以寓吾意也晚守泗州翁彥國勤王不進久留泗上表之面叱責之且約不復餉其軍彥國媿而去及張邦昌僞赦至率

郡官哭於天慶觀而焚其赦書僞命卒不能越泗而南所試纔一郡而所立如此許潁之間獵徒謂之賈大夫云 紹興末謝景思守括蒼司馬季思佐之皆名伋劉季高以書與景思曰公作守司

馬九作倅想郡事皆如律令也聞者絕倒

張達明雖早歷清顯致位綱轄然未嘗更外任奉祠

居臨川郡守月旦謁之達明見其騶導歎曰人生唯五馬貴

宋史勾濤傳濤除給事中知池州秦檜常令人喻意欲與共政濤謝之檜諷言官劾之不報帝謂檜曰勾濤性喜泉石與一山水近郡檜對曰永嘉有天台雁蕩之勝帝又曰永嘉太遠以湖州命之俄以疾卒

老學庵筆記辛叅政企李守福州有主管應天啟運宮內臣武師說平日郡中待之與監司等企李初視事謁入謂客將曰此特監當耳待以通判已是過禮乃令與通判同見明日郡官朝拜神御企李病足必扶掖乃能拜既入至庭下師說忽叱候卒退曰此神御殿也企李不爲動顧卒曰但扶自當具奏雍容終禮既退遂奏待罪朝廷爲降師說爲泉州兵官云

獨異志張嘉祐爲相州刺史至都詢故事皆云前後太守多不生出郡城苟不流死則貶嘉祐按其

圖籍自後周尉遲迴死王事始也乃爲迴立廟四時享之後三年入拜大金吾到吳競加以冕服而
其後皆榮遷去

文公政訓王詹事守泉初到任會七邑宰勸酒歷告之以愛民之意出一絕云九重天子愛民深令
尹宜懷惻隱心今日黃堂一杯酒使君端爲庶民斟七邑宰皆爲之感動故民吏無不畏愛去之日
父老兒童攀轅者不計其數公亦爲之垂淚至今泉人懷之如父母

宋史王大寶傳大寶知連州代還言連英循惠新恩六州居民纔數百非懋遷之地月輸免行錢宜
蠲減高宗謂大臣曰守臣上殿令陳民事遂得知田里苦疾所陳五六得一可行其利亦不細矣

廣東通志張宋卿字恭父擢進士第除祕書正字胡銓張浚力薦謂才堪大用竟出爲肇慶守禮賢
興學未幾卒初宋卿方娠父夢人贈詩曰白蓮池上白蓮兒一舉成名天下知四十二年聞富貴滿
船空載月明歸及宋卿卒於官年四十二舟還初殯僧剎名白蓮軒旣葬於羅浮麻姑峯前有小池
號白蓮夢之驗如此 李維泉州人淳熙初守南恩弟綸提舉廣東常平約別江濱兄弟相勵以

清白綸臨江矢言曰儼負君民有如此水遂投杯於江杯停不沒者久之觀者驚歎民歌曰石門之